

# ՀԱՅԱՍՏԱՆՈՒՄ ՈՒՇ ՄԻՋՆԱԴԱՐՈՒՄ ՇԻՆԱՐԱՐԱԿԱՆ ԳՈՐԾԻ ԿԱԶՄԱԿԵՐՊՈՒՄԸ

ՄՈՒՐԱՏ ՀԱՍՐԱԹԵԱՆ

Հայաստանի վաղ միջնադարի եւ զարգացած աւատատիրական դարաշրջանի շինարարական տեխնիկան եւ շինարարական գործի կազմակերպումը եղել են հայ ճարտարապետութեան պատմութեան մասնագէտների ուսումնասիրութեան առարկայ: Թ. Թորամանեանի, Վ. Յարութիւնեանի, Հ. Ղալփախեանի, Ստ. Մնացականեանի, Ս. Բարխուդարեանի այդ խնդրին նուիրուած աշխատանքներում լուսարանուած են Դ.—ԺԴ. դարերի յուշարձանների տեխնիկական առանձնատկութիւնները (շինանիւթերը, կառուցման տեխնիկան, կոնստրուկցիաները), եւ յատկապէս, շինարարական գործի կազմակերպումը: Այդ տեսակէտից ուշ միջնադարի Հայաստանի շինարարական արուեստը, ինչպէս հարկն է, չի ուսումնասիրուած, եւ այդ այն դէպքում, երբ ԺԵ.—ԺԸ. դարերի խնդրոյ առարկայ հարցի վերաբերեալ մեծաքանակ փաստական նիւթ է պարունակուում յուշարձանների պատերին եղած արձանագրութիւններում, պատմիչների մօտ, ձեռագրերի յիշատակարաններում: Այս առումով հայ ճարտարապետութեան ուշ միջնադարի փուլը չահաւէտ տարբերոււմ է նախորդ փուլերից, որոնց շինարարական գործի կազմակերպման ողջ ընթացքը այսօր կարելի է վերականգնել դեռ զգալի մօտաւորութեամբ:

Ուշ միջնադարում եկեղեցական նոր շէնք կառուցելու համար պարտադիր էր իշխանութիւնների թոյլտուութիւնը: Արեւելեան Հայաստանում այդ հարցով կաթողիկոսները զիմում էին Պարսից շահին կամ նրա տեղապահին, ընդ որում՝ յատուկ թոյլատրութիւն էր պահանջուում ոչ միայն եկեղեցի՝ այլեւ զանգակատուն կառուցելու համար: Այսպէս, օրինակ, էջմիածնի Մայր տաճարի զանգակատան կառուցման համար Փիլիպոս Կաթողիկոսը զիմել էր Երեւանի Մահմատղուլի խանին «կաշառօք եւ բազում խնդրանօք»: Բայց մերժում էր ստացել: Պաշտամունքային շինութիւնների կառուցման թոյլտուութիւնը Հայաստանի կառավարիչների, ինչպէս

նաեւ Պարսից արքունիքի համար եկամտի լրացուցիչ աղբիւր էր: Փիլիպոսին յաջորդած Յակոբ կաթողիկոսը զանգակատան թոյլտուութիւնը Երեւանի նոր սարդար Նաջաֆիտուլի խանից ստացաւ միայն «բազում ոսկի եւ արծաթ տալով նմա եւ նորին իշխանացն»<sup>2</sup>:

Դարաշամբի Ս. Ստեփանոս Նախավկայ Վանքի եկեղեցու կառուցման համար ղիմեցին Շահարաս Առաջինին, ընդ որում՝ թոյլտուութիւնը գրաւոր էր, կնքուած եւ ստորագրուած արքունի պաշտօնեաների կողմից<sup>3</sup>: Արքայական թոյլտուութիւնը զուգակցուած էր տուեալ գաւառի պարսիկ իշխանաւորի բանաւոր համաձայնութեամբ. օրինակ, Ագուլիսի Ս. Յովհաննէս եկեղեցին 1664 թուին սկսեցին շինել «թագաւորի ըռաղամով, Միրզա Իրրահիմի խօսքով, գերայ Ագուլիս նորայ զաֆտումն էր»<sup>4</sup>:

Ուշ միջնադարում եկեղեցիների կառուցումը Ֆինանսաւորուել է տարբեր աղբիւրներից: ԺԵ.—ԺԼ. դարերի վանքային համալիրներ, խոշոր եկեղեցիներ շինուեցին էջմիածնի, Գանձասարի, Աղթամարի կաթողիկոսութիւնների միջոցներով: Շինարարական մեծածաւալ աշխատանքներ Իրականացրեցին, մասնաւորապէս, էջմիածնի Մովսէս Տաթեւացի, Փիլիպոս Աղբակեցի, Նահապետ Եղեսպցի եւ Սիմէոն Երեւանցի կաթողիկոսները:

Կատարած աշխատանքների ծաւալով եւ շինութիւնների քանակով կաթողիկոսութիւններից յետոյ գալիս են խոշոր վանքերը, որոնք լինելով հարուստ աւատատիրական տնտեսութիւններ՝ իրենց միջոցներով կառուցում էին ոչ միայն վանքի նոր եկեղեցիները եւ աշխարհիկ շէնքերը՝ այլեւ մօտակայ «անապատները» ու բնակավայրերի եկեղեցիները: Այսպէս, օրինակ, Տաթեւի Վանքը ԺԷ.—ԺԸ. դարերին կառուցեց միջնադարեան յուշարձանախմբի շուրջը աշխարհիկ շէնքերի մի հսկայական համալիր, մօտակայ Մեծ Անապատում բնակելի խցերի խումբ, Հալիձորի Հարանց Անապատում պարիսպ, Տաթեւ գիւղում՝ Ս. Մինաս եկեղեցին<sup>5</sup>:

Ուշ միջնադարում հանդէս եկաւ մեկենասների մի նոր խաւ: Եթէ ԺԲ.—ԺԴ. դարերում խոշոր կառոյցներն իրականացուած էին իշխանական տների միջոցներով՝ ապա նրանց վերացումից յետոյ այդ գործը ստանձնեց հայ վաճառականութիւնը: Խոջաքական կապիտալը ԺԶ.—ԺԸ. դարերում մեծ դեր խաղաց ծաւալուն շինարարական աշխատանքների Ֆինանսաւորման գործում, յատկապէս Արեւելեան Հայաստանում: Զուղայի, Ագուլիսի վաճառականների միջոցներով նոր եկեղեցիներ եւ կրօնական համալիրներ կառուցուեցին ոչ միայն իրենց հայրենի գաւառում՝ Գողթնում, այլեւ նրա սահմաններից դուրս (Սոր Վիրապ, Շատին Վանք, Շնչէրի Կուսանաց Անապատ, Լոր գիւղի եկեղեցի եւ այլն): Էջմիածնի զանգակատունը շինուել է պոլսեցի պարոն Անտոն Զելիպիի, իսկ Երեւանի Զօրաւոր Եկեղեցին՝ Սոջա Փանոսի ծախսով: Հայ վաճառականութիւնը շահագրգռուած էր երկրում անխափան գործող հաղորդակցութեան կապերով եւ

նիւթապէս ապահովում էր կարեւոր ճանապարհների վրայ կամուրջների շինարարութիւնը: Մեծահարուստների գումարներով ԺԴ դարում խոշոր կամուրջներ կառուցուեցին Աշտարակում՝ երեւանցի մահտեսի Խոջա Գրիգորի, իսկ Երեւանում՝ քանաքեռցի Խոջա Փլաւի միջոցներով:

Սակայն խոշոր շէնքերի եւ եկեղեցիների կառուցումը լրիւ իր միջոցներով իրականացնելը կարող էին թոյլ տալ միայն եզակի մեծահարուստները: Այս պատճառով ուշ միջնադարում երեւան եկաւ մեծածաւալ շինարարութեան Փինանսաւորման հետաքրքիր եւ նոր ձեւ՝ առանձին անհատների կամ ընտանիքների ծախսով կառուցում էին կամ նորոգում քաղաքացիական եւ եկեղեցական շէնքերի առանձին մասերը միայն: ԺԸ դարում էջմիածնի Վանքի պարիսպների հիւսիսային բուրգերից մէկը կառուցուել է ղափանցի մահտեսի Գրիգորի, երկրորդը՝ սառաֆ մահտեսի Զաքարիայի, երրորդը՝ Տէր Կարապետի միջոցներով, իսկ պարսպի «եօթ գազ» երկարութեամբ հատուածը՝ ազուլիսցի Յովսէփի գումարով (այս բոլորը արձանագրութիւններով նշուում էր կառուցի համապատասխան մասի վրայ)<sup>6</sup>: Մուղնու Ս. Գէորգ Եկեղեցու հարաւ-արեւելեան սիւնը եւ նրա վրայ հանգչող արեւմտեան կամարը շինուել են պարոն Վարդանի եւ նրա եղբոր՝ Դաւիթ Վարդապետի «խարճով»<sup>7</sup>: Տարբեր մեկենասներ են կառուցել Քանաքեռի Ս. Աստուածածին եռանաւ բազիլիկի առանձին մոյթերը:

Ընդունուած էր նաեւ հանգանակութիւնը, ընդ որում՝ վերջինս կատարուում էր ոչ միայն նոյն կամ մօտակայ բնակավայրերում՝ այլեւ հեռաւոր գաւառներում, որոշ եկեղեցական շէնքերի համար ընդունելով նոյնիսկ համահայկական բնոյթ: Օրինակ, Մուղնու Ս. Գէորգ Եկեղեցու կառուցման համար վանքի առաջնորդ Յովհաննէս Վարդապետը 1669 թուին. «... եկեալ էր որ Ազուլիս, սուրբ Գէորգայ մասն բերել վասն ժողով անելու, քանզի Մուղնու սուրբ Գէորգայ անուան եկեղեցին այս Բ(2) տարի այ, որ շինում է: Պարտք ունէր. եկաւ Ազուլիս, Լ(30) թուման կիտեց, գնաց Ուրդուվար»<sup>8</sup>:

Ուշ միջնադարում մեծ թուով ծխական եկեղեցիներ կառուցուեցին տուեալ համայնքի, գիւղի բնակչութեան ընդհանուր միջոցներով, որը առանձին նշուում էր շինարարական արձանագրութիւնում. օրինակ՝ «Մենք Փիփեցոյ ժողովուրդս միարան շինեցաք», «Արդեամբ Միրզիկայ սուրբ Գարրիէլ եկեղեցիս շինեցաւ 1674 ամբ», «Արդեամբ Խաչկապաց ժողովրդոց շինեցաւ...»<sup>9</sup>:

Շինարարական գործի կազմակերպման համար նախաձեռնողները՝ կաթողիկոսները, վանքերի առաջնորդները, գիւղի տանուտէրերը, կամ ծախսը հոգացող մեկենասները նշանակում էին «վերակացու» ընդ որում ոչ թէ քարգործ վարպետներից՝ այլ համայնքի հեղինակաւոր մարդկանցից կամ վանքի միարանութիւնից: Օրինակ, Փիլիպոս Կաթողիկոսը էջ-

միածնի Ս. Գալիանէի Տաճարի համար «վերակացու եւ գործավար» կարգեց Յովհաննէս արեղային՝ «այր արդիւնաւոր եւ գործօնեայ»<sup>10</sup>, իսկ Սոր վիրապի Ս. Գրիգոր Լուսաւորիչ եկեղեցու կառուցող, մեկենաս Շմաւոն Ազուլեցին «վերակացու դրեց... եկեղեցին շինելու երեւանցի Յակոբջանի որդի Ռհան—բարէն»<sup>11</sup>։ Երեւանի Զօրաւոր Ս. Աստուածածին Եկեղեցու վերակացուն Դաւիթն էր, իսկ 1793 թուի վերանորոգման ժամանակ՝ պարոն Գրիգորը, «սոյն գործառնութեան ժիր վերակացուն»<sup>12</sup>։

Որոշ ղէպքերում շինարարութիւնը ղեկավարում էին մէկից աւելի վերակացու՝ Ազուլիսի Ս. Քրիստափոր Եկեղեցին 1671 թուին կառուցելիս՝ «Վերին թաղի խոջայ Գուլնազարն, Քիչիրէկն, Մայխասն վերակացու եղնն, ժողովրդեան փողով շինեցին»<sup>13</sup>։

Վերակացուները պատասխանատու էին շինարարութեան ողջ ընթացքի, միջոցների ճիշդ ծախսման համար եւ հրաւիրում էին ճարտարապետի կողմից ղեկավարուող շինարարների խմբերին, որոնք ուշ միջնադարում շրջիկ էին եւ եկեղեցիներ ու աշխարհիկ խոշոր շէնքեր էին կառուցում Իրենց հայրենի բնակավայրերից բաւական հեռու։ Ժէ.—ԺԸ. դարերում Արեւելեան Հայաստանում մեծ հեղինակութիւն էին վայելում Վասպուրականի ճարտարապետները եւ վարպետները, որոնց հրաւիրում էին Արարատ, Սիւնիք, Գողթն՝ կարեւոր շէնքերի կառուցման համար։ Վասպուրականից («Քրդստանից») հրաւիրուած ճարտարապետները կերտեցին Ժէ. դարի լաւագոյն յուշարձանները՝ Մուղնու Ս. Գէորգ Եկեղեցին, էջմիածնի Մայր Տաճարի զանգակատունը, Շնհէրի, Ազուլիսի եկեղեցիները։

Ուշ միջնադարում ճարտարապետները հիմնականում կոչւում էին պարսկերէնից փոխանցուած «ուստա» անուանումով, սակաւաթիւ՝ «մէյմար» արարերէն բառով (յայտնի են Ներքին Վարազավանքը նորոգող Մէյմար Տիրատուրը եւ Երեմեբա Վանքի պարիսպը 1663 թուին կառուցող Մէյմար Գրիգորը), եւ հայերէն «վարպետ» կոչումով (պահպանուել են 1447 թուի Ամիթի Եկեղեցին կառուցող վարպետ Նեքամատի եւ Ժէ. դարում Սիւխանի Դաստակերտ աւանի եկեղեցին շինող Թումա վարպետի անունները)<sup>14</sup>։ Ի սպառ չի օգտագործուած ԺԳ. դարում լայնօրէն տարածուած «վարդպետ» անուանումը, ինչպէս նաեւ «քարգործը» որի փոխարէն կիրառուած է «քարահատ»։ Մահակ Հիգանեցու տապանագրից յայտնի է դանում նաեւ այդ ժամանակաշրջանի խոշոր ճարտարապետներին տրուող կոչումները՝ նա անուանուած է «մէյմար պետ» եւ «մեծ ուստա», ինչպէս նաեւ նշուած են այդ մասնագիտութեան միւս հոմանիչները՝ «քարահատ» եւ «ճարտար»<sup>15</sup>։ Իսկ «ճարտարապետ» անուանումը հանդիպում է միայն մէկ անգամ՝ 1638 թուի ձեռագրի յիշատակարանում<sup>16</sup>։

Հայաստանում ուշ միջնադարում շէնքերի նախագծման մասին փաստեր չեն պահպանուել, չկան եւ որոշակի տեղեկութիւններ պատմիչների

մօտ եւ յիշատակարաններում: Միջնադարում տարածուած մանրակերտա-  
յին նախագծումը աւելի ուշ չի կիրառուել. ԺԵ.—ԺԸ. դարերի եկեղեցիներ-  
ի քարէ սակաւաթիւ մանրակերտները սոսկ ճակտօնագարդ են, չէնքի յօ-  
րինուածքի հետ առնչութիւն չունենալով (օրինակ, Երեւանի Զօրաւոր ե-  
կեղեցի): Սակայն նկատի ունենալով, որ արդէն ԺԶ. դարում շինարարա-  
կան գծագրեր գոյութիւն են ունեցել Ռուսաստանում եւ Միջին Ասիայում՝  
ապա միանգամայն հաւանական է դառնում զարգացած շինարարական  
արուեստ ունեցող Հայաստանում նոյնպէս նմանօրինակ նախագծման կի-  
րառումը ԺԷ.—ԺԸ. դարերում: Նրա գոյութեան կողմնակի ապացոյցն է  
Պարսից շահի հրամանով Արեւելեան Հայաստանում բոլոր եկեղեցիների  
եւ վանքերի չափագրութիւնը, որը կատարուեց 1664 թուի Յունուարին<sup>17</sup>:

Ուշ միջնադարում ակնյայտ է եկեղեցիների զանգուածային շինարա-  
րութեան գործում «տիպար» եւ «պատճէն» կառոյցների գոյութիւնը: Պա-  
տուիրատուն որոշել է եկեղեցու տիպը, իսկ ճարտարապետը տիպարային  
յօրինուածքի դէպքում, իր վարպետութեան եւ փորձի թոյլատրած սահ-  
մաններում ձգտել է անհատականութիւն հաղորդել կառոյցին: Օրինակ,  
մօտ հարիւրի հասնող եռանաւ բազիլիկների համար տիպար է ծառայել  
Ժամանակագրական առումով ամենավաղ՝ Հարանց Անապատի եկեղեցին,  
որը ԺԷ. դարում կրօնական գործիչներ պատրաստեց ողջ Հայաստանի վան-  
քերի ու անապատների համար: Եռաստիճան զանգակատների տիպարը  
նոյնպէս առաջին օրինակը հանդիսացող էջմիածնի Մայր Տաճարի զան-  
գաշտարակն էր: Որմնախորշերով միանաւ բազիլիկների առաջնեկը՝ Բէ-  
խի Անապատի եկեղեցին տասնեակներով կրկնուեց Սիւնիքում:

Ապագայ չէնքի յատկազօային յօրինուածքը նշահարում էր վաղօ-  
րօք նախապատրաստուած շինարարական հրապարակում. այդ մասին ո-  
րոշակի տեղեկութիւն կայ էջմիածնի Վանքի համայրի կառուցման կա-  
պակցութեամբ<sup>18</sup>: Հայաստանում միջնադարում կիրառուող չափի միաւոր  
«կանգունը» (մօտ 51 սմ.), յետագայում՝ ԺԷ.—ԺԸ. դարերում այլեւս չի  
օգտագործուում: Ուշ միջնադարում Հայաստանում շինարարական գոր-  
ծում ընդունուած միաւորը պարսկական գազն էր (112 սմ.): Այն կիրառ-  
ուում էր ինչպէս եկեղեցական՝ այնպէս էլ քաղաքացիական չէնքերի կա-  
ռուցման Ժամանակ եւ Ժողովրդական ճարտարապետութեան մէջ<sup>19</sup>:

Սակայն այս երեւոյթն ընդհանուր բնոյթ չունի եւ ուշ միջնադարի  
չատ յուշարձանների վրայ չի տարածուում: Կրօնական համայրներին ա-  
ռանձին կառուցուածքների վերլուծութիւնը ցոյց է տալիս, որ կիրառուել  
են երկարութեան տարբեր չափեր՝ մոդուլներ թէ՛ չէնքի ընդհանուր  
յօրինուածքում եւ թէ՛ նրա առանձին մասերում: Օրինակ, Մեծ Անապատի  
բազիլիկի յատկագիծը (ինչպէս եւ բարձրութեան որոշ չափեր) ստեղ-  
ծուած է միաւոր ընդունելով 61 սմ. երկարութեան մոդուլը: Նոյն անա-

պատի միաբանութեան խցերի յատակագծային—ծաւալային ողջ յօրինուածքի համար ընդունուած է մոդուլ՝ հաւասար 71 սմ.: Շնչէրի Կուսանաց Անապատի սեղանատունը կառուցուած է 63 սմ. մոդուլի հիման վրայ: Այս առումով հետաքրքրական է Մեղրու գմբէթաւոր բազիլիկի յատակագծի վերլուծութիւնը: Այստեղ մոդուլը հաւասար է 61 սմ.ի եւ կազմում է գմբէթի տրամագծի մէկ տասներորդ մասը: Շէնքի լայնութեան սկզբնական չափը եղել է 22 մոդուլ: Իսկ եկեղեցու երկարութեան չափը որոշելիս սխալ է տեղի ունեցել՝ հարաւային պատը նշահարման ընթացքում մէկ մոդուլ պակաս են վերցրել, քան հիւսիսայինը. եթէ վերջինիս երկարութիւնը հաւասար է 40 մոդուլի՝ ապա հարաւայինն ուղիղ 39 մոդուլ է: Շէնքը եզրագծով ստացուել է անկանոն ուղղանկիւն. սա աւելի պարզ երեւում է չափագրութիւնից յետոյ: Այս սխալը մէկ անգամ եւս ապացուցում է, որ ուշ միջնադարում հիմնականում շէնքի արտաքին չափերն են վերցրել մոդուլներով, ընդ որում ամբողջական թուերով արտայայտուած:

Վերը բերուած օրինակներում հանդիպեցինք երկարութեան միաւորի տարբեր մեծութիւնների՝ 61 սմ., 63 սմ., 71 սմ.: Հանդիպում են նաեւ այլ միաւորներ՝ 80 սմ., մօտ մէկ մեթր: Չափերի այս բազմազանութիւնն արդիւնք էր Հայաստանի տարբեր գաւառներում ընդունուած միաւորների եւ առանձին ճարտարապետերի կամ շին. արարական խմբերի նախասիրութեանը: Վերջիններս ունեցել են սեփական նախընտրած չափը, որով եւ առաջնորդուել են այս կամ այն յուշարձանի կառուցման ժամանակ: Իսկ ինչպէ՞ս են առաջացել վերը նշուած չափի միաւորները եւ ի՞նչ ֆիզիքական հիմք ունեն նրանք: 112 սմ.-ը պարզ է՝ դա պաշտօնական ընդունուած չափն է՝ պարսկական գազը: Իսկ միւս չափերի ընտրութեան ժամանակ որոշիչ դեր են խաղացել մարդու (ամէն որոշակի դէպքում՝ տուեալ ճարտարապետի կամ վարպետի) կազմուածքի համաչափութիւնները: Չափումները ցոյց են տալիս, որ մարդու 170 սմ. հասակի դէպքում (այսպիսի միջին հասակ յատուկ է եւ հայերին) ստացուում է չափի միաւորի հետեւեալ ընտրուած մեծութիւնները.

100—102 սմ. — կողք ուղղուած ձախ ձեռքի միջամատի ծայրից մինչեւ կրծքի մէջտեղը.

80—82 սմ. — կողք ուղղուած եւ բռունցք կազմած ձախ ձեռքի ծայրից մինչեւ կրծքի մէջտեղը.

70—72 սմ. — կողք ուղղուած ձախ ձեռքի ուսից մինչեւ միջնամատի ծայրը.

60—62 սմ. — կողք ուղղուած եւ բռունցք կազմած ձախ ձեռքի ծայրից մինչեւ նոյն ձեռքի ուսը: Այս միաւորը կիրառելու համար աւելի յարմար է, որովհետեւ չափողը կարող է ձախ ձեռքով բռնել թելի ծայրը, իսկ աջով

այն ձգել մինչև ուսը:

Պարսկական գազի չափը՝ 112 սմ., նոյնպէս ելնում է մարդուց՝ այն հաւասար է աջ ուսից մինչև մի կողմ պարզած ձախ ձեռքի միջամատի ծայրը եղած հեռաւորութեանը:

Այս չափերը տարածուած են եղել եւ այլ երկրներում: Միջնադարում Միջին Ասիայում կիրառուել է 60—62 սմ. երկարութեամբ գազ: Նոյն միջինասիական խանութիւններում մինչև ժ.Ձ. դար օգտագործուել է նաեւ այսպէս կոչուած, «թիմուրի գազը», հաւասար՝ 70—72 սմ. ի: 71 սմ. ի է հաւասար նաեւ մէկ արշինը:

Շինարարական գործում մոդուլների կիրառումը (թէկուզ եւ տարբեր չափերի) զգալի օգնում էր ճարտարապետներին ու վարպետներին մտայլացումը տեղում իրականացնելու եւ շէնքի ամբողջ յօրինուածքի եւ նրա մասերի ներդաշնակ համակարգութիւններ ստանալու համար:

Հայաստանում շինարարական գործում օգտագործուել է արարական չափի միաւոր «հալարին» (հալէպեան), որով չափել են շէնքերը եւ գետնի վրայ նշահարել շինութիւնների յատակագծերը<sup>20</sup>: Հալարին հաւասար էր 0.8 մ. ի, եւ նրանով նոյնպէս չափերը վերցրել են ամբողջական թուերով<sup>21</sup>:

Ճարտարապետի՝ «մեծ ուստայի» ղեկավարութեամբ աշխատող խումբում եղել են տարբեր մասնագիտութեան վարպետներ՝ Յովհաննասիւնի նորոգման ժամանակ «ժողովեաց բազում վարպետս՝ քարահատ եւ փայտատաշ, եւ դարբին», ընդ որում մեծամասնութիւն են կազմել քարտաշ բանուորները՝ «երեսուն քարտաշ հանապազ նստեալ քար տաշէին, եւ երկու ճարտար մէմար միշտ շարէին»<sup>22</sup>: Որմնադիր ճարտարապետի եւ քարտաշ վարպետների թուի յարաբերութիւնը կախուած աշխատանքների ծաւալից եւ ժամանակի սղութիւնից՝ տարբեր են լինում: Ազուլիսի Ս. Քրիստափոր Եկեղեցու կառուցման ժամանակ այն եղել է 30, իսկ յաջորդ տարում 40 վարպետ, «Մեծ ուստայի» ղեկավարութեամբ աշխատող<sup>23</sup>:

Կառուցուող շէնքի բնոյթից կախուած՝ տարբեր էին աշխատող վարպետների մասնագիտական կազմը՝ աղիւսի կիրառման ժամանակ մասնակցում են աղիւսագործները, քարային աշխատանքների աւարտից յետոյ՝ ծեփողները: Վարպետներից բացի կային նաեւ սեւագործ բանուորներ (հողային, օժանդակ աշխատանքների, շինանիւթ բերելու, շաղախ պատրաստելու համար), որոնք կոչուում էին «մշակ»<sup>24</sup>:

Կրօնական կենտրոններում շինարարութեան մասնակցում էին նաեւ հոգեւորականները՝ ղպիւրները, արեղաները եւ աշակերտները, որոնք օժանդակում էին վարձուած աշխարհական բանուորներին՝ «մշակներին»: Վարձուում էին նաեւ «տնտեսները», որոնց պարտականութիւնն էր կերակրել շինարարութեան վրայ աշխատողներին: Ս. թովմայի Վանքի վերակա-

ուուցման ժամանակ ութ երիտասարդ հոգեւորականի հետ միասին աշխատում էին «եւ զդասս աշխարհականացն, որ վարձկան եղեն», ընդամէնը եօթ հոգի, որոնց թւում «եւ զՄիքայէլ տնտեսն, զոր այսքան շինութեան հացսն եփեցին»<sup>26</sup>:

Շինարարութեան կազմակերպման գործում կարեւոր էին շինանիւթի հայթայթումը եւ ժամանակին մատակարարումը: Այդ պարտականութիւնը դրուած էր համայնքի (եթէ կառուցումը բնակավայրում էր կատարուում), կամ վանքի ու անապատի միաբանութեան վրայ, որի մասին նոյնիսկ որոշակի նշում էր շինարարական արձանագրութիւններում<sup>26</sup>: Կիրառուում էր տեղական շինանիւթը՝ տուֆը կամ պազալտը, որը հանուում էր կառուցի մօտ գտնուող արդէն գործող կամ նոր բացուած քարհանքերից: Աղիւս պատրաստելու համար եւս օգտագործուում էր չրջակայքի կաւը՝ Ագուլիսի Ս. Քրիստափոր եկեղեցու շինարարութեան համար «վանքի հողէն քարփիչ երեցին»<sup>27</sup>:

Սակայն մի շարք դէպքերում շինանիւթը բերուում էր հեռուից, որը տեղանքի կտրտուածութեան ու բանուկ ճանապարհների բացակայութեան դէպքում կապուած էր մեծ դժուարութիւնների ու բարդութիւնների հետ: Միաժամանակ այդ երկարացում էր շինարարութեան տեւողութիւնը եւ այն թանկացնում: Մտեփանոս Նախավկայ Վանքի կառուցումը «...բազում աշխատութեամբ եւ յոլով ծախիւք յամս տասն ապա կատարեցաւ զի քարն եւ զկղմինդրն ի գեղջէն Աստապատայ բերէին տփով զերեսօք ջուրց Երասխ գետոյն եւ մասն ինչ է քարանցն յԱրարգ զէղէն բերին ձիով. սոյնպէս եւ զկիրն եւ զփայտն եւ զհացն ի հեռու վայրաց բերէին մեծաւ աշխատութեամբ...»<sup>28</sup>: Գետի միւս ափից ձիով բերուեցին քարը եւ կիրը Յովհաննա-վանքի վերանորոգման ժամանակ<sup>29</sup>:

Ժէ. դարում նոր եկեղեցիներ կառուցելիս կամ հները հիմնովին վերակառուցելիս՝ շարուածքում օգտագործուում էին խաչքարեր եւ տապանաքարեր: Այդ վերաբերում է յատկապէս ծխական եկեղեցիներին, որոնց շուրջը յաճախ տարածուում էր բնակավայրի գերեզմանոցը: Սակայն տապանաքարերի որպէս շինաքար կիրառելիս ակնյայտ առկայ է անարդար մօտեցումը: Չաքարիս Ագուլեցին այդ մասին որոշակի նշում է Ս. Յովհաննէսի վերակառուցման ժամանակ՝ «գերեզմանատունն էլ վարթարաւ արարին. ոմն նշանաւոր մեռել կէր, զայն թողին, ապայ անտէրն, աննշան մեռելն քարն վեր կայան, ոմն դրին եկեղեցու պատն, ոմն ձգեցին եկեղեցու դռներն»<sup>30</sup>: Այս է պատճառը, որ Ժէ. դարում եկեղեցիների պատերին դրուած հանդիպում են ոչ միայն մինչեւ ԺՁ. դար թուագրուող տապանաքարեր՝ այլ նոյնիսկ Ժէ. դարի սկզբի գերեզմանաքարեր:

Վիճազրերի եւ պատմական աղբիւրների առանձին տեղեկութիւններից հնարաւոր է պատկերացում կազմել շինարարական գործի մի կարեւոր

Հարցի՝ վարձատրման դրուածքի մասին: Միջնադարեան Հայաստանում շինարարների աշխատանքի վարձատրման երեք եղանակ գոյութիւն ունէր՝ միանուագ (ճարտարապետերի համար), գործարքային (քարտաշների համար) եւ օրավարձ (սեւագործ բանուորների համար):

Ուշ միջնադարում վճարի հիմնական ձեւը միանուագն էր, որովհետեւ ճարտարապետերը եւ քարտաշ վարպետները աշխատում էին համատեղ մէկ խմբում եւ վարձատրուում էին միասին, շինարարական եղանակի աւարտին: Սրանով է պայմանաւորուած այդ ժամանակաշրջանում պատերի տաշուած քարերի վրայ վարպետների նշանների բացակայութիւնը, որի հիման վրայ միջնադարում կատարուում էր իւրաքանչիւր քարտաշ բանուորի վարձատրութիւնը<sup>31</sup>:

Ուշ միջնադարում օրավարձով աշխատում էին «մշակները», իսկ գործարքային վարձատրուում էին քանդակագործները, դարբինները, ատաղձագործները: Զրի էին աշխատում ծխական եկեղեցիներ կառուցելիս գիւղացիները, իսկ վանքերում՝ միաբանութեան անդամները:

Շինարարական աշխատանքները կատարուում էին գարնանից մինչեւ աշուն, ընդհատուելով ձմեռանը: Աշնանը ճարտարապետը եւ իր խումբը միանուագ ստանում էին այդ տարուայ կատարուած աշխատանքի վարձը, որը կոչուում էր «ամառային վճար»<sup>32</sup>: Բնակելի շէնքերը կառուցուում էին մէկ եղանակի ընթացքում: Զաքարիա Ազուլեցին իր երկու—երեք յարկանի տունը կառուցեց 1670 թուի Ապրիլի 20-ից մինչեւ Նոյեմբեր 1ը՝ ծախսելով «թէ ուստի, թէ արկաթէ զենի, թէ փայտի, թէ դուրգարի ու թէ գալի, թէ քարի համար 65 թուման»<sup>33</sup>: Թէ ո՞րքան էին ստանում ճարտարապետերը եւ վարպետները առանձին՝ յայտնի չէ: Արձանագրութիւններում եւ պատմիչների մօտ նշուում է միայն ընդհանուր գումարը: Յղնայի Ս. Աստուածածին գմբէթաւոր բազիլիկի կառուցման համար վճարուել է 12 լիտր ոսկի (60 կգ)<sup>34</sup>, Փիլիպոս կաթողիկոսը էջմիածնի վանքի նորոգութիւնների ժամանակ միայն փայտէ աշխատանքների համար «ն(1000) դուռուշ նաղտ դրամ նորին արհեստաւորացն ետ»<sup>35</sup>:

Շինարարութեան Ֆինանսաւորման լրացուցիչ աղբիւր էր դեռ անաւարտ եկեղեցու պատերին խաչեր փորագրելու իրաւունքի համար որոշ գումար վճարելը: Ազուլիսի Ս. Քրիստափոր Եկեղեցու «գ(3) ուրմին իե (25) խաչ, ոմն պատկեր վասն յիշատակի գրեցին... Ամէն խաչի, թէ պատկերի մէկ մէկ թուման տուին եկեղեցուն»<sup>36</sup>:

Եկեղեցիների կառուցման տեւողութիւնը տարբեր է՝ Ազուլիսի Ս. Քրիստափոր գմբէթաւոր բազիլիկինը հինգ տարի է, Տաթեւի Մեծ Անապատի եռանաւ բազիլիկինը՝ մօտ վեց տարի, Հերհերի Ս. Գրիգոր Եկեղեցիինը՝ ինը տարի, Նորաշէնիկի Աստուածածին բազիլիկինը՝ 13 տարի: Բայց ժէ՛ դարում աշխատանքների մասնագիտացումը թոյլ է տուել զգալի կըր-

ճատել շինարարութեան տեւողութիւնը: Այսպէս՝ Ազուլիսի Ս. Յովհաննէս եկեղեցին կառուցուել է 1664 թուի Յուլիսի 5ից մինչեւ Նոյեմբերի 5ը՝ 16 ամսուայ ընթացքում<sup>27</sup>: Խոր Վիրապի Ս. Գրիգոր Լուսաւորիչ միանալ եկեղեցու շինարարութիւնն աւելի կարճ է տեւել՝ 1670 թուի սկզբից մինչեւ Սեպտեմբերի 20ը՝ մօտ 9 ամիս<sup>28</sup>: Ուշ միջնադարի միանալ դահլիճները եւ եռանալ բազիլիկների մեծ մասը կառուցուել են մէկ տարում: Շնչէրի Կուսանաց Անապատի բազիլիկը, ըստ շինարարական արձանագրութեան, ըսկսել են կառուցել 1676 թուի Ապրիլի 4ին եւ աւարտել նոյն թուի Սեպտեմբերի 30ին՝ շինարարութիւնը տեւել է վեց ամսից էլ քիչ, ընդամէնը 178 օր: Այսպիսի կարճ ժամկէտ չի հանդիպում ոչ մի ուրիշ եկեղեցական շէնքում:

Չնայած այսպիսի սեղմ ժամկէտերին՝ ուշ միջնադարում եկեղեցիները կառուցուում էին մեծ խնամքով եւ բարձր որակով, որի շնորհիւ նրանց մեծ մասը դիմանալով վերջին երեքհարիւրամեակի բնական արհաւիրքներին՝ կանգուն ու առանց հական նորոգումների հասել է մեզ: Միայն մէկ դէպք է յայտնի, երբ թուրք-պարսկական պատերազմի ժամանակ՝ 1630 թուին աղիւսով եւ փայտով ու ըստ երեւոյթին անորակ եւ հապճէպ կառուցուած Ազուլիսի Ս. Քրիստափոր եկեղեցին ընդամէնը քառասուն տարի անց ինքն իրեն փլուեց («Բ. թագաւորաց կռիւ էր Երեւանայ բերդին վրայ, վասն այն՝ կէսն երած քարփիչով, կէսն փայտով շինեցին. վասն ահիւ մին տարով շինեցին...»)<sup>29</sup>: Եկեղեցին կառուցուեց նորից, հինգ շինարարական եղանակի ընթացքում, Վասպուրականից հրաւիրուած ճարտարապետերի ու վարպետների ուժերով, քարի ու աղիւսի կոնստրուկցիաները առանձին շինարարական խմբերի ուժերով շինելով: Այս եկեղեցու կառուցման օրինակով, որը մանրամասն նկարագրել է Չաքարիա Ազուլեցին, կարելի է լրիւ պատկերացում կազմել ուշ միջնադարում շինարարական աշխատանքների կազմակերպման գործի վերաբերեալ: Առաջին տարում հիմնովին քանդել են նոյն տեղում եղած հին եկեղեցին եւ նորի հիմքերը շինել... «մինչի եհաս հողի հաւասար»: Երկրորդ տարում 30 վարպետից կազմուած խումբը բարձրացրել է պատերը (սրբատաշ քարից), մինչեւ... «դռների գլուխը»: Ընդ որում շինարարական աշխատանքները կատարուել են գարնանից մինչեւ աշուն (Նոյեմբեր), ամբողջովին դադարեցուելով ձմեռուայ ամիսներին (երեք ամիս):

Երրորդ տարում խումբը կազմուած է եղել արդէն 40 հոգուց, որոնք Մարտի 20ից Նոյեմբերի 1ը բարձրացրել են պատերը մինչեւ ծածկի թաղերը: Վարձատրութիւնը եղել է ըստ առանձին աշխատանքների՝ պատերը հիմքից մինչեւ թաղերը կառուցող խումբը միանուակ ստացել է իր հասանելիք գումարը աշխատանքները վերջացնելուց յետոյ: Չորրորդ տարում աշխատել է նոր խումբ՝ 18 հոգուց կազմուած, որը կառուցել է թաղերը եւ կամարները (տախտակամածների օգնութեամբ):

Քարային աշխատանքները վերջանալուց յետոյ՝ շինարարութեան վերջին, հինգերորդ տարում, կառուցուել են շէնքի աղիւսէ մասերը: Եկեղեցու գմբէթն իրականացուած է աղիւսից, որն, ինչպէս տեսանք, բնորոշ է Գողթն, Երնջակ, Արեւիկ գաւառների համար: Աշխատանքի մասնագիտացումն աւելի ցայտուն երեւում է այս դէպքում: աղիւսի պատրաստման համար հրաւիրել են տեղացի վարպետներ, որոնք եկեղեցու կողքին աղիւսի թրծման վառարան են շինել: Աղիւսէ ծածքը կառուցել են ջուղայեցի երկու վարպետ, իսկ գմբէթի համար նորից հրաւիրել են Վասպուրականի վարպետներին, մոկսեցի ճարտարապետի ղեկավարութեամբ: Պէտք է նշել, որ այս եկեղեցին կանգուն եւ անփոփոխ հասել է մեր օրերը:

Կառուցումն աւարտելուց յետոյ եկեղեցիները օծում էին եւ անուանակոչում: Այս կապակցութեամբ հետաքրքրական է դիտարկել ուշ միջնադարում եկեղեցիների անուանակոչութեան հարցը, թէ զերազասութիւնը ո՞ր սրբին էր տրւում եւ ապա, դարերի ընթացքում, այն ի՞նչ փոփոխութիւն է կրել: Հայաստանի վաղ միջնադարի եկեղեցիների անուններից քչերն են նշուել շինարարական արձանագրութիւններում եւ պատմիչների մօտ: Ժամանակի ընթացքում, վերաբնակեցումների ու գաղթերի պատճառով, հնագոյն եկեղեցիների մի մասը նոր անուն է ստացել: Հաւաստի փաստական նիւթից յայտնի է դառնում, որ վաղ միջնադարում եկեղեցիների մեծ մասը կոչուել է Աստուածածնի անունով, երկու անգամ պակաս՝ Ս. Գէորգի, ապա Ս. Ստեփանոսի, Ս. Յովհաննէսի եւ Գրիգոր Լուսաւորչի անուններով:

Թ.—ԺԴ. դարերում եկեղեցիների անունները նշուած են վիճագրերում եւ գրական աղբիւրներում: Այս դարերում եւս եկեղեցիների մեծ մասը (մօտ մէկ երրորդը), նուիրուած են Աստուածածնին, երկուս եւ կէս անգամ պակաս՝ Գրիգոր Լուսաւորչին, ապա Ս. Յովհաննէսին, Ս. Խաչին, Ս. Գէորգին եւ Ս. Ստեփանոսին:

Ուշ միջնադարում նոյնպէս եկեղեցիների մօտ մէկ երրորդը նուիրուած էր Աստուածածնին: Երեք անգամ քիչ է տարածուածութեամբ երկրորդ՝ Ս. Ստեփանոս (նաեւ Ս. Ստեփանու Նախավկայ) անունը: Յաջորդաբար գալիս են Ս. Յովհաննէս (Ս. Յովհաննէս Կարապետ, Յովհաննէս Մկրտիչ), Ս. Գէորգ, Ս. Յակոբ (Ս. Յակոբ Հայրապետ), Ս. Գրիգոր (Ս. Գրիգոր Լուսաւորիչ) անունները: ԺԵ.—ԺԸ. դարերում եկեղեցիները կոչուել են մօտ 30 անունով, որոնց թւում են Ամենափրկիչ, Ս. Խաչ եւ Ս. Նշան, Ս. Հռիփսիմէ, Ս. Սարգիս, Թարգմանչաց, Ս. Մինաս, սակաւաթիւ՝ Ս. Յարութիւն, Ս. Թովմաս, Ս. Պետրոս, Ս. Պօղոս—Պետրոս, Ս. Սիոն, Երրորդութիւն, Ս. Շմաւոն, Ս. Գաբրիէլ (կամ Հրեշտակապետաց), Ս. Վարդան, Ս. Եղիշէ, մէկական անգամ՝ Ս. Թադէոս, Ս. Պօղոս, Ս. Գրիգորիս, Ս. Քրիստափոր, Շողակաթ, Հիզարուգիտ<sup>[6]</sup>:

Եկեղեցիները, որպէս կանոն, նուիրուած են մէկ սրբութեան: Աչքի է զարնուած վաղ միջնադարից մինչեւ ԺԸ: դար Հայաստանում Աստուածանին նուիրուած եկեղեցիների քանակի զգալի գերակշռութիւնը: Առաջինը քրիստոնէութիւնը որպէս պետական կրօն ընդունած երկրում Աստուածամօր այսպիսի համընդհանուր եւ արտակարգ տարածուած պաշտամունքը միջնադարում բացառիկ երեւոյթ էր քրիստոնէական աշխարհում եւ Հայ Առաքելական Եկեղեցու առանձնայատկութիւններից մէկն է:

### ԾԱՆՕԹԱԳՐՈՒԹԻՒՆՆԵՐ

1. Պատմութիւն Առաքել Լարդապետի Գարիժնոյ, Վաղարշապատ, 1896, էջ 277: Այսուհետեւ Գարիժնոցի:
2. Նոյն:
3. Նոյն, էջ 233:
4. Չարսրիսա Ազուլնոյ Օրագրութիւնը, Երեւան, 1938, էջ 63: Այսուհետեւ Ազուլնոցի:
5. Գիւան Հայ Վիճագրութեան, սրակ 2. Գորիսի, Միսիանի եւ Ղափանի Շրջաններ, Ս. Բարխուդարեան, Երեւան, 1960, էջ 11-54:
6. Ալիշան, Այրարատ, «Ամենօր», 1890, էջ 212:
7. Ս. Սաղումեան, «Մուղնու Ս. Գեորգ Եկեղեցին եւ նրա վիճագրերը» Էջմիածին, 1977, թիւ 1, էջ 52: Այսուհետեւ Սաղումեան:
8. Ազուլնոցի, էջ 84:
9. Ե. Լալայեան, Գանչակի Գատ, Թիֆլիս, 1901, էջ 103, 105, 108:
10. Գարիժնոցի, էջ 267:
11. Ազուլնոցի, էջ 82:
12. Կ. Ղափնադարեան, Միջնադարեան Յուշարչանները եւ Վիճակն Արշակունցիները, Երեւան, 1975, էջ 166:
13. Ազուլնոցի, էջ 96:
14. Ս. Բարխուդարեան, Միջնադարեան Հայ Եարդարապետներ եւ Քարգործ Վարպետներ, Երեւան, 1963, էջ 106, 111, 113, 115:
15. Սաղումեան, էջ 30:
16. Հայերէն Զննագրերի ԺԷ. Գարի Յիշարակարաններ (1621-1640թթ.), հտ. Բ., Երեւան, 1978, էջ 742: Այսուհետեւ Հայերէն Զննագրեր, Բ.:
17. Ազուլնոցի, էջ 63:
18. Գարիժնոցի, էջ 253:
19. Ազուլնոցի, էջ 90:
20. Գարիժնոցի, էջ 253:
21. Նոյն, էջ 254:
22. Նոյն, էջ 282:
23. Ազուլնոցի, էջ 96:
24. Հայերէն Զննագրեր, Բ., էջ 743:
25. Նոյն:
26. Գիւան Հայ Վիճագրութեան, սրակ 5. Արցախ, Ս. Բարխուդարեան, Երեւան, 1973, էջ 166:
27. Ազուլնոցի, էջ 97:

28. Դարիժեցի, էջ 281:
29. Նոյն, էջ 282:
30. Ազուլեցի, էջ 130:
31. Ս. Մնացականեան, «Միջնադարեան Հայաստանի շինարարական գործի կազմակերպման մի քանի հարցերը, եւ վարպետների նշանները», **Պատմա-Քանասիրական Հանդես**, քիւ 3, 1958:
32. Ս. Սաղոմեան, «Ե՞րբ եւ ուրե՞ն են կառուցել Էջմիածնի Մայր Տաճարի զանգակատունը», **Էջմիածին**, քիւ 5, 1976, էջ 30:
33. Ազուլեցի, էջ 90-91:
34. Ե. Լալայեան, **Գողթն**, Թիֆլիս, 1912, էջ 82:
35. Դարիժեցի, էջ 261:
36. Ազուլեցի, էջ 86:
37. Նոյն, էջ 63-65:
38. Նոյն, էջ 82:
39. Նոյն, էջ 96-97:

Մ-Հ.

THE PLANIFICATION OF THE  
CONSTRUCTION WORK IN ARMENIA  
IN THE LATE MIDDLE AGES  
(Summary)

MOURAD HASRATIAN

With the help of certain historical data, colophons of Armenian manuscripts, mural inscriptions and archival givens, it is now possible to clarify the construction process in the late Middle Ages in Armenia. In the XV-XVIII centuries church construction was financed by different sources, such as the Catholicosate, monasteries, and popular contributions. It was at this time that there emerged a new class of patrons; the merchants, who financially helped the erection of new churches and monasteries, renovated the cells and various quarters in both the old churches and monasteries, dug water channels, constructed bridges, etc. Those who took the initiative, organized and directed the construction work appointed superintendents, who were either chosen from the community members or from the congregation of a given monastery. These were wholly responsible for the progress of the work, the right spending of financial means, and inviting the masons, who in those days moved from one construction site to the other. The masons from Vaspourakan (the region of modern Van) were appreciated most.

Real information and data lack on the existence of architectural schemes, designs and drawings, but the fact that they existed in Russia and the Middle East in the XVI century, and that the Persian emperor ordered in 1664 to write down in registers the measurements of all the Armenian churches at least in his empire, make us believe that there undoubtedly existed architectural planification and designing in Medieval Armenia. Later information tell that the construction plans were first put down and marked on the ground and only then the construction work began. In doing this the Persian *gaz*, a measurement unit of 1.12 m., was used.

Payment was done in three different ways: a. in lump form (to the architect and master masons); b. according to the amount of the work achieved (to the blacksmiths, carpenters, etc.); and c. in the form of daily wages (to the sundry labourers).